

Inatsisartut aningaasanut inatsisaanik toqqammaveqarluni erhvervsstøttemi pujlemik pilersitsinissaq siunertaralugu inatsisissatut siunnersuummik suliaqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut *Siverth K. Heilmannimit (A) aamma Knud Kristiansenimit(A) saqqummiunneqartoq*

pillugu

Inatsisartut Aalisarnermut, Piniarnermut Nunalerinermullu Ataatsimiititaliaata

ISUMALIUTISSIISSUTAA

Siunnersuutip aappassaaneerneqarnerani saqqummiunneqartoq

Inatsisartut Aalisarnermut, Piniarnermut Nunalerinermullu Ataatsimiititaliaat suliarinninnermini kingullermik ukuningga inuttaqarpoq:

Inatsisartunut ilaasortaq Hans Aronsen, Inuit Ataqtigiit, Siulittaasoq

Inatsisartunut ilaasortaq Niels Thomsen, Demokraterne, Siulittaasup tullia

Inatsisartunut ilaasortaq Hans Enoksen, Siumut

Inatsisartunut ilaasortaq Juliane Henningsen, Inuit Ataqtigiit

Inatsisartunut ilaasortaq Finn Karlsen, Siumut

UKA 2010-mi 14. oktober siullermeerinerup kingorna Ataatsimiititaliap siunnersuut mисsorsorpa.

Siunnersuutip imarisaa siunertaalu

Naalakkersuisut aningaasanut inatsisikkut qulakkeerneqartumik erhvervsstøttepulje-mik pilersitsinissaat siunnersuutigineqarpoq. Aningaasanut inatsisikkut ataasiartamik taarsigassarsiatut aningaasaliissuteqartoqartalernissaa kiisalu taarsigassarsistseqqinnissaq siunertaralugu taarsigassarsianut erniat utertitallu akiliutigineqartut erhvervsstøttepulje-mut ilanngunneqartarnissaat siunnersuummi siunniunneqarpoq. Erhvervsstøttemik pissarsisinnaasunut immikkut ilaatinneqarput aalisarnermik, piniarnermik nunalerinermillu inuussutissarsiutillit. Inuussutissatigut imminut pilersornerulernissaq aamma aalisarnermik, piniarnermik nunalerinermillu inuussutissarsiutit imminut akilersinnaasunngornerunissaat piffissaq ungasinnerusoq eqqarsaatigalugu siunnersuuteqarnikkut siunertarineqarpoq.

Siunnersuutip Inatsisartuni siullermeerneqarnera

Siunnersuut taama isikkoqartillugu siunnersuutip siullermeerneqarnerani partiit akornanni amerlanerussuteqarfigineqanngitsoq Ataatsimiititaliap maluginiarpa. Siunnersuutip sukumii-nerusumik suliarineqarnissaa siunertalugu Ataatsimiititaliamut innersuussutigineqarpoq.

Siunnersuutip Ataatsimiititaliamit suliarineqarnera

Suliniutit aalisarnermik, piniarnermik nunalerinermillu inuussutissarsiutit aningaasaqarnikkut imminut napatinnerulernissamik siunertaqartut imaluunniit Kalaallit Nunaanni inuussutissanik imminut pilersornerunissamat iluaqutaasinnaasut suleqatigiissutigineqarnissaannut ataatsimut isigalugu kissaatigineqartoq Ataatsimiititaliap maluginiarppaa.

Erhvervstøttepulje-mut teknikikkut immikkuualuttut pillugit siunnersuummi ersarissumik saqqummiussisoqanngitsoq Ataatsimiititaliap maluginiarppaa. Aalajangiiffigisassatut siunnersuummi immikkut aalisarnermik, piniarnermik nunalerinermillu inuussutissarsiutit taaneqarmata inuussutissarsiutini taakkunani suliaqartut erhvervsstøttepulje-mit iluaqutissinneqarnissaat siunertaasooq Ataatsimiititaliap naatsorsuutigaa. Tamatuma saniatigut inuussutissarsiutit inuussutissanik pilersitsisannigitsut ilaatineqarnissaat kissaatigineqanngitsoq Ataatsimiititaliap naatsorsuutigisariaqarpaa. Ataatsimiititaliamut suliassanngortitsinermi Inatsisartut aamma taamatut siunertaqarunarput, siunnersuummi Inuussutissarsiornermut ataatsimiititaliamut inuussutissarsiutinut tapersiisarnernut allanut suliassaqaarfimmut suliassanngortinneqanngimmat, taamaallaalli Aalisarnermut, Piniarnermut Nunalerinermullu ataatsimiititaliamut suliassanngortinneqarluni.

AIS 2011-imi suliassaqaarfimmi 50-imi aamma 51-imi aalisarnermik, piniarnermik nunalerinermillu inuussutissarsiutit siuarsarneqarnissaannut aningaasaliissutit pioreersut arlallit allasimapput. Aalisarnermik piniarnermillu inuussutissarsiutillit inuussutissarsiornerannik siuarsaaneq pillugu Inatsisartut peqqussutaat nr. 10, 20. november 2006-imeersoq kingusinnerusukkullu allannguutai kiisalu Nunalerinermik inuussutissarsiornerup siuarsarneqarnissaa pillugu Inatsisartut inatsisaat nr. 6, 2. december 2009-imeersoq naapertorlugit aalisarnermik, piniarnermik nunalerinermillu inuussutissarsiutit pimoorussusiffiusut unammillersinnaasullu siuarsarneqarnissaat konto 51.07-imi (ESU-mut tunngassuteqartuni) aningaasaliissutitigut periarfissaapput. Tamatumani suliniutaasut suliassaqaartitsinikkut inuiaqatigiillu aningaasarsiornerannut ajunngitsumik sunniuteqarnissaat tunaartarineqarpoq. Inatsisit matumanittaaq siunertatut konto 51.07-mi immikkut oqaasertaliussat soorlu ernialersugaanngitsunik akilersugassaanngitsunillu taarsigassarsisitsinikkut kiisalu ernianut tapiissuteqarnikkut aamma ernialinnik taarsigassarsisitsinikkut inuussutissarsiutit siuarsarnissaannut taarsigassarsisitsinissamat Naalakkarsuisut piginnaatippaat. Aammattaaq konto pingaarneq 50.06.50 aalisarnerup ineriartortinneranut immikkoortitaasut, konto pingaarneq 51.03.02 aamma konto pingaarneq 51.03.03 nunalerinermik inuussutissarsiuteqartunut ineriartortitsinermut aamma aningaasalersuinermut tapiissutit kiisalu konto pingaarneq 51.01.04 inuussutissarsiutigalugu aalisartut, inuussutissarsiutigalugu piniartut aamma inuussutissarsiutigalugu nunalerinermik ingerlataqartut aallarteqqinnissaannut tapiissutit periarfissaapput. Tamakku tunuliaqutaralugit aalisarnermik, piniarnermik nunalerinermillu inuussutissarsiuteqartut inuussutissarsiutaasa siuarsarneqarnissaannut aaqquissuussinerit arlaqaqisut atuutereersut Ataatsimiititaliaq isumaqarpoq.

Ataatsimiititaliap maluginiarppaa inuussutissarsiutinut siuarsaanermut aaqquissuussinernit a-

tuuttunit taarsigassarsianit taarsiilluni akilersuinerit nikerartorujussuusut. Taamaalillutik ESU-mut kinguaattoorutit august 2009-mi 71,3 mio. kr.-t missaanit september 2010-mi 75 mio. kr.-t missaannut amerleriarsimasut Ataatsimiititaliaq ilisimatinneqarpoq. Tamatuma arlalippasuarunik peqquteqarsinnaaneramik, soorlu aalisarnerup ajorneramik, motorimik ajornartorsiuteqarnermik, aningaasanik aqutsinerup amigaateqarneramik, aningaasarsiornikkut ataatsimut isigalugu ajorseriarnermik, unitsitsigallarnissamut periarfissanik imaluunniit taarsigassarsisup allanik taarsigassarseqqissimaneramik inuussutissarsiutinut tapersiisarnermit taarsigassarsiaminit salliutillugit taarsersukkaminik, Naalakkersuisut paasissutissiinerat ataatsimiititaliamit tusaatissatut tiguneqarpoq.

ESU-mut taarsersuinermit akilersueriaatsit maannamut misilittagaasut tunuliaqutaralugit taarsigassarsianik taarsersuilluni akilersuinerit taamaalillunilu aningaasat taarsigassarsiissutigineqaaqqissinnaaneramat nammineq akilersuisinnaaanermit siunertap aamma ukiumoortumik aningaasalersuinerit pinngitsoortitsisinnaannginnerup naammassineqarsinnaanera erhvervsstøttepulje pillugu aalajangiiffigisassatut siunnersuutikkut qanoq naammattumik qulakkeerinnitoqarsinnaanersoq Ataatsimiititaliamit paasineqanngilaq.

Siunnersuutip aningaasaqarnikkut kingunerisassai

Erhvervsstøttepulje-mik siunnersuut inuussutissarsiutinut aaqqissuussinernut atuuttunut ilasuteqarnissamik imaaluunniit taarteqarnissamik siunertaqarnerisat ersarissumik saqqummiunneqanngilaq, tamannami siunnersuutip aningaasalersorneranut pingaaruteqartuuvoq isiginiarneqartariaqarpoq. Taamaakkaluarterli aningaasanut inatsisissatut maanna siunnersuummi konto pingaarnermit 50-imi aamma 51-imi aningaasat allatut tulleriaarneqarnissaannut ersarissumik imaaliiallaannaq periarfissaqanngitsoq Ataatsimiititaliaq isumaqarpoq. Aammattaaq inuussutissarsiutit siuarsarnissaannut aaqqissuussinernut atuuttunut assersuunneqarsinnaasuni piffissaq ungasinnerusoq eqqarsaatigalugu aningaasaqarnikkut pitsaasumik sunniutaasussat naammattumik suli misissorneqarsimanngitsut Ataatsimiititaliap tusaatissatut tiguaa.

Ataatsimiititaliap inassutai

Ataatsimiititaliami amerlanerussuteqartut Inuit Ataqtigiiinneersut aamma Demokraatiinneersut siuliani oqaaseqaatit siullermeerinermilu oqaatigineqartut tunuliaqutaralugit siunnersuut **itigartinneqassasoq** inassutigaat.

Ataatsimiititaliami ikinnerussuteqartut Siumumeersut siunnersuut pillugu ima oqaaseqasapput:

Siumumiit ilungersunartutut isigaarput aalisartunut piniartunullu inuussutissarsiornikkut aningaasalersuinissamik aallaaveqartumik Atassutip siunnersuutaa Erhvervsstøttepulje-mik pileritsinissamik siunnersuut ataatsimiititaliami amerlanerussuteqartunit itigartinniarneqarmat tamannalu Siumumiit isumaqataaffiginnilarput makku pissutigalugit.

Ukiuni kingullerni aalisarnikkut periarfissat killeqariartuinnarfiini aningaasalersuinerillu appariartuinnarfiini isumaqarluinnarpugut una inuussutissarsiornikkut periarfissanik aalisartukkunnut piniartukkormiunullu pitsaanerulersitsinissamut aqquataassussaagaluatoq.

Nalunngilarput ilaatigut aningaaseriviit periarfissatut atorneqarsinnaasut, kisiannili ukiuni makkunani aalisakkat akii taamak appasitsigitillugit aningaaseriviit aamma aningaasalersuisinnaanerat aalisartukkormiunut allanullu inuussutissarsiortunut ajornakusoortorujussuusooq ilisimalluaratsigu, tassami aningaaseriviit attartortitsinerminni erniaat imak qaffasitsigisarput ilaatigut aningaasarsiornikkut kipusuuallannermi nammaneqarsinnaasaratik.


Tamakkulu pissutigalugit Siumumiit assut iluatinnartutut isigigipput Atassutip siunnersuutaa inuussutissarsiortortatta nukittorsarniarneranni aningaasalersuinerit eqaatsut erniakitsullu periarfissiissutigissallugit pissusissamisoorluinnartoq tamakkiisumik tapersissallugu.

Aammalu ilanngullugu oqaatiginiarparput periarfissaqartitsinitta aningaasalersuinikkut killeqartitsivallaarnerat pissutaalluni nunatsinni selskabersuit angisuut aalisartunik aningaasalersuinikkut pituttuisut, tamannalu aalisartut namminersorsinnaanerannik annertuumik killilersuisuuvoq allaat sumut tulaassissanersut aammalu qanoq akeqassanersut qulaaniit aalajangerneqartarluni.


Allaat aalisartut allamut akinik pitsaanerusunik angusaqarniarlutik tulaassigaangata pillarneqartarlutik tamannalu KNAPK-imiit assut ernumassutigalugu arlalippassuarnik oqariartuutigineqartarpoq.

Taamatut oqaaseqarluta siunnersuut tamakkiisumik Inatsisartuni akuersaarneqassasoq Siumumiit inassutigaarput.


Siuliani Ataatsimiititaliami ikinnerussuteqartut siullermeerinermilu oqaatigineqartut tunuliaqutaralugit siunnersuut **akuerineqassasoq** inassutigaat.




 Hans Aronsen,
 Siulittaasoq



 Niels Thomsen, Siulittaasup
 tullia



 Hans Enoksen



 Juliane Henningsen



 Finn Karlsen